

第四冊

卷之四

建置志

公署

監獄

渠堰

令典志

鹽法

郵傳

祥異志

城池

倉庫

普濟堂

橋路

田賦

兵防

修武縣志

修武縣志卷四

修武縣知縣馮繼照纂輯

建置志

城池
橋路

公署

倉庫

監獄

普濟

渠堰

善作者必善繼一邑中如城池公署倉庫監獄普濟渠堰橋路昔人勦之皆所以便公家利民生也後人以官爲傳舍因循忽視任其廢墜而不顧公私曷賴焉今次其勦建之由皆有關於公家典役之大若夫隨時補繕毋使頽敗又不能無望於後之君子云

城池

始勦未詳明洪武初增築

府志

城土垣周圍四里高二丈廣一丈城四門東曰迎暉
西曰歸化南曰阜民北曰仰高門各有樓明景泰
三年知縣郭應誠增修復設角樓四座敵臺二十
四座正德十三年知縣冷宗元增修甃堞一千二
百八十有奇嘉靖四十年知縣賈如愚修隆慶三
年知縣李可愛改修樓堡萬歷十年知縣趙可學
修二十年知縣邵炯增蓋樓堡崇禎五年城爲賊
豹五所破八年知縣周多才重修廣舊城四之一
高舊城三尺

國朝康熙二十三年知縣李啟泰重修雍正七年知
縣陳綱詳允動帑興修城垣照舊用土重築身高

一丈三尺九寸上廣一丈址三丈城門城樓角樓
敵臺關馬牆馬道俱照舊用甄乾隆五十年署縣
朱近曾補修城堞五十二年知縣洪運仁補修城
垣嘉慶元年知縣唐宇旺四年知縣吳有容又修
葺之道光八年知縣鄒光曾修西門掉橋九年知
縣邵鳳依修城垣竝南北掉橋十四年知縣馮繼
顛重修東西城樓補修城垣竝東西掉橋

濠深半丈廣丈明隆慶三年知縣李可愛濬竝築
護隄高八尺

國朝康熙二十三年知縣李啟泰重濬雍正七年知
縣陳綱重濬護隄廢道光五年知縣鄒光曾濬深

五尺引小丹河水注之八年復濬十九年知縣馮
繼照濬隍築隄復舊

東門內東西大街一道

通西門

南後東西街一道

路北白衣堂南北巷一條

路南鹽店南北街一

道

路南石塔南北巷一條

南城根水塘一

西門內東西大街一道

通東門

路南塔底南北巷一

條

塔底東西街一道

路南濟瀆廟西南北巷

一條

濟瀆廟前東西街一道

北後東西街一

道

南城根水塘一

北城根水塘一

南門內南北大街一道

通謙樓

路西勝果寺東西街

一道

寺後東西巷一條

南城根水塘一

北門內南北大街一道 東後南北小街一道 東

城根水塘一

新街東西街一道 後新街東西街一道 縣東試

馬街一道 縣西興賢街一道 城隍廟後水塘

武安驛東水塘一 新街東首北城根水塘

西首西城根水塘一

明翰林院侍講劉儼新城記

畧云正統十四年秋月北鄙告警是時承平日久民不知兵皆震驚欲遠遁廷議近邊郡縣令築城以衛內捍外使其民有恃而不恐詔許之修武地當西邊往來之衝乃率先修葺爲防禦計然卑隘

削薄若環堵然故民之震驚自若也縣尹郭侯患之景泰三年春四方無虞時和年稔侯曰吾可以有爲矣乃屬耆老士夫諭以興築之利不築之害眾皆再拜曰侯將以是惠我民也莫不爭先趨令侯躬親臨之自正月始事二月卒工城高二丈五尺下闊視高減五之一四門爲樓重檐複道城之上爲譙樓凡若干間皆渾堅壯麗自關中達於京師所過州郡城池未能或過也初侯興是役皆謂工大費繁非積數稔未易集事至是未兩月告成蓋侯經營有方處置得宜力不妄用財不妄費復掘得古錢數十萬竣事餘以復百姓租故事速成

而民益德之欲刻石誓侯功於是鄉貢進士張圯
來京徵予記侯名應誠西蜀富順世家茲歲嘉禾
生於邑中是其應也景泰癸酉二月己亥日立

明詹事府少詹事傅冠修武縣修城記

畧云修武爲豫屬巖邑武廟時山寇竊發邑無險
可恃殘掠獨甚迄今上崇禎之五年寇變再告毀
城塞濠袁山周湛若使君受修武事甫數月治城
長千有一百丈廣舊城四之一高舊城一雉城樓
四城角望樓八城堞凡千四百有奇十堞一堡十
堡一整環城有更廬櫺比復爲濬隍廣二丈許深
丈許肇始於崇禎八年乙亥二月八日五閱月而

成

知縣馮繼熙重修東西兩門敵樓及四周城垣碑
記

邑有城垣門樓所以重保障慎封守詰姦宄而便
行旅也顧地當孔道輪蹶出入無停晷震動搖撼
土石陷而根腳浮又遇積雨浸淫狂飈怒號木瓦
垣墉剝蝕摧折馴致傾圯故其工程較數而難修
武城建自何年志乘無攷舊係土城歲久坍塌嘉
慶十八年閒滑縣警前任楊君廉乃勸諭邑人稍
事補苴不二十年旋失舊觀矣余下車日卽登城
閱視故壘頽垣幾如廢址慨然曰是誰之責也邪

縣故有四門業無一完整而東西門樓并無片瓦
一椽之存計興工莫急於此然經費無出余乃首
捐俸廉倡勸紳士輸貲俾購料鳩工而分門董率
其事諏吉於道光十四年三月十一日啟工至麥
後併力成之於是東西城樓六閒及門洞襟牆工
作堅固加以丹雘壯觀迄六月二十日而役竣然
後慶財力之餘於四周城垣缺者完之殘者整之
復以次釅事維時工殫費罄獨南北城樓未修余
以久旱故患民力未舒念邑人雖好義急公議俟
歲豐再舉旋稟憲允行是役也上不請發度支下
不假手吏胥不妨農時不竭物力官民一體眾志

成城海守土者之幸也爰爲之記

坊表

大成坊 在學宮前

德配天地道冠古今兩坊 在學宮兩偏知縣鄒光

曾重修

甯城古治坊 在縣治前知縣李啟泰重修

節孝坊 在節孝祠前

舊志

凌雲坊 爲舉人姜昀立今廢

三進士坊 爲王璠張圮趙銳同科立今廢

敕贈坊 爲前知縣趙欽贈寺丞立今廢

錦標坊 爲舉人趙志學立今廢

承芳坊

爲舉人姜郃立今廢

登瀛坊

爲舉人聶聰立今廢

紹先坊

爲舉人張鶴立今廢

奮翼坊

爲舉人閻宣立今廢

世科坊

爲舉人王琮立今廢

獨步坊

爲舉人郭檄立今廢

龍光坊

爲舉人王傑立今廢

重光坊

爲舉人趙澗立今廢

高曜龍門坊

爲舉人馬澗立今廢

旌表坊

爲秦節婦立今廢

貞節坊

爲楊巍妻曹氏立今廢

節孝坊

爲孝子薛復亨節婦王氏立今廢

節孝坊

在縣北板橋營爲庠生傅文鳳妻薛氏立

節孝坊

在縣西店後邨爲馮鏜妻李氏立

貞節坊

在西關爲郃光榮妻趙氏立

節孝坊

在縣南周劉邨爲薛振奇妻李氏立

節孝坊

在縣西梁莊爲趙瑤妻劉氏立

節孝坊

在北門裏爲薛守身妻張氏立

節孝坊

在南關爲連天位妻范氏立

節孝坊

在縣南大衛邨爲許鳳岐妻李氏立

節孝總坊

在東街節孝祠前知縣馮繼照建

道光十三年禮部議得定例直省貞孝節烈婦女

應

旌表者該督撫學政會同具題由部核議題準後入
方官給銀三十兩聽本家建坊又或因世遠年久
未經呈報尙有府縣志事蹟可憑者準其子孫補
請

旌表各等語又道光七年江蘇巡撫疏請武進陽湖兩
縣貞孝節烈婦女題請給銀三十兩總建一坊當
經臣鄧具奏奉

旨準行在案今據河南巡撫楊國楨查得修武縣已故
現存及志載節烈婦貞女劉周氏等二百一十二
名俱係孝義兼全阨窮堪憫應如所請循照江蘇

省稟建總坊之例準於該縣節孝祠外總建一坊

照例

旌表以勵人心而端風化恭俟

命下

臣

部行令該巡撫轉飭地方官給銀三十兩聽該

紳士等於該縣節孝祠外總建一坊其已故節烈婦貞女祠內設位致祭之處照定例遵行等因奉

旨依議欽此

公署

縣署居城之中

大堂三間明洪武五年建成化七年知縣宋驥修宏治十一年知縣張爾甫重修

國朝順治十四年知縣卜永昇重修乾隆十三年被

火知縣柯時懋重修額曰異鵲堂道光五年知縣

鄒光曾增修卷棚三間十五年知縣馮繼照廣卷

棚外堂臺一丈暨甬道俱鋪以石又補葺東西科

房三十九間知縣卜永昇縣堂左箴人生百年內立德立功立言皆可以與天地共垂

不朽士君子能從有用處著精神卻是過一日實

大受用一日若祇營營於富貴及昏昏於醉飽清

夜捫心將與草木同腐竟是過一日虛度了一

人品成就只在數十年內慎勿當下錯過縣堂

右箴士君子一行作吏可以為所欲為乃古人不願為第一品官惟願為第一品人者以官秩及身而止人品與天地無極也然能愛官品方成人品若貪殘昏惰獵取功名無補於世不成官品便不成人品矣堂七尺百年內正有無窮作用切勿向一官中錯作

儀門三間戒石亭一座明萬歷中知縣趙可學建亭

廢

上諭碑一座雍正六年知縣陳綱立

大門三間阜快壯捕班房共三十五間

譙樓一座乾隆十九年知縣王靖重修

旌善亭申明亭在譙樓前收糧房在譙樓西康熙中

知縣李啟泰重修今俱廢

寅賓館在儀門東偏北向

明萬曆中知縣趙可學建道光十六年知縣馮繼照

重修

遞運所裁

二堂曰來雨堂三間明成化中知縣冷宗元建道光

五年知縣鄒光曾於堂後增修卷棚五間

三堂曰景韓堂五間原名欲善堂暨東首吏隱齋三
間俱康熙中知縣宋師祁建乾隆中知縣戈雲錦
易名景韓道光五年知縣鄒光曾重修更吏隱齋
顏曰如舟十四年知縣馮繼照於齋東重修椽竈
二間堂後西夾道建書房三間曰青螺館十五年
於堂後東夾道增修帳房一間後北屋二間東羣
房八間十七年重造門房四間連署內舊有者共
八十五間

四堂曰瑞穀堂五間竝東西挂屋各二間十六年知
縣馮繼照重建是年穀多雙歧故以名之

五堂五間東偏院北房三間西偏院北房二間

自三堂後共屋一百二十五間

舊有縣丞署在縣署東北隅共二十九間內有冰
葉堂順治中縣丞劉可久重修嘉慶九年缺裁署
廢變價爲民業道光十二年州同李繼文以西一
段順長三十一弓三尺五寸計地六分二釐八豪
一絲捐入馬號知縣趙銘彝添蓋馬棚十五間十
七年知縣馮繼照捐俸一百一十兩復契買東一
段順長三十三弓一尺南闊一十二弓二尺北闊
一十二弓計地一畝六分八釐七豪七絲分南之
半爲馬閑北之半爲蔬圃

典史署 在縣署西共二十八間內有勵翼堂康熙

中典史張奇重修道光十四年典史陳紹祖重修
儒學署 在學宮後教諭廡明隆慶中知縣趙可學
建

國朝康熙六年知縣仇鳳翀重修增建齋房東西各
五間訓導廡明萬歷中知縣趙光宇建乾隆三十
年知縣戈雲錦重修

抱總住宅 在縣治東係舊察院改

倉庫

常平倉 卽舊志預備倉在縣署譙樓東知縣黃世
經建共四十四間今慶字廡房十一座共四十九間

十一號廡七間道光十六年知縣馮
繼照重建三號廡三間十八年重建

修武縣志 卷四
原額穀二萬石

漕倉 在縣署東把總署前向係義社倉今豐字廩

房十座共四十七間

九號廩四間道光十五年知縣馮繼照重修

原額穀一萬石

薊倉 在縣署西太公館後向係勸捐倉登字廩房

十座共四十七間今廢改貯常平倉內

原額穀一萬石嘉慶七年撥入常平倉四千四百

四石七斗九升六合一勺於道光八年十二月內

奉文毋庸買補

義社倉

在漕倉內

原額穀三百九十石九斗三升六合於乾隆五十

年五月賑粥動用訖

後無買補

勸捐倉

在薊倉內

原額穀一千四百九十石二斗三升五合歷年出

借在民於乾隆五十年三月奉文豁免

後無買補

庫樓 東西各三間在縣署大堂後兩傍

監獄 在縣署二門內西邊工科房後

普濟堂 舊在北門外年久傾圮嘉慶二十四年知

縣趙銘彝捐錢十千契買僧會司淨域地東西十

九弓南北十四弓計地一畝一分九豪移建普濟

堂於東關外驛路之北大門一閒住房十九間東

牆外有楊烈女菊姐墳一座門臨大溝建甃橋一

座道光十二年復任後又添蓋住房二十七間北
門外普濟堂舊址地一畝五分四釐五豪又乾隆
四十一年官買順城關張安地六分二共二畝一
分四釐五豪給貧民頭耕種照管堂事並爲楊烈
女墳祭埽之需

一舊存本銀七百五十六兩七錢每年徵息銀一
百七十三兩八錢六分八釐

一舊存紳商捐施制錢二十千文每年徵息錢四
千八百文

一舊存民捐永治屯地一頃四十七畝三分七釐
七豪五絲每年租錢十四千七百三十八文遇閏

加增 續收雍正十二年生員趙來賓捐范莊地
三十畝每年租錢五千零四十文遇閏加增 續
收李邨地八十三畝九分四釐三豪每年租錢十
六千七百八十九文遇閏加增 續收楊樓地一
十六畝四分七釐每年租錢三千二百九十四文
遇閏加增 續收蔣子貴捐孟邨地二畝每年租
錢六百文以上計地二頃七十九畝七分九釐五
絲共徵租錢四千四百六十一文

一撥入李屯荒地七頃六十五畝零於道光十八
年定租每畝錢一百文共徵租錢七十六千五百
文

舊收養貧民四十四名今增添三十名共收養貧民七十四名

每貧民一名日支口糧錢十文共應支錢二百六十六千四百文

每貧民一名冬給棉衣錢四百文共應支錢二十九千六百文

以上共支錢二百九十六千文下賸錢作爲貧民醫藥棺殮之需如有不敷官爲捐給

渠堰

小丹河爲運河

河南通志小丹河入衛濟漕康熙二十九年四月

總河王新命巡撫閩興邦題定小丹河經修武獲嘉以達新鄉合河鎮之處若有淺阻責令管河各官量爲疏濬

小丹河隄

通志自武陟縣界起至獲嘉縣界止又獲嘉北岸有修武縣丹河一百二十三丈二尺共長一萬一千二百六十一丈九尺五寸兩岸各築小隄長與河等

西驛路溝

通志自縣西起至甯郭驛交界止長四十五里寬五尺深三尺雍正五年勦開

東驛路溝

通志自縣東起至獲嘉縣交界止長二十里寬五尺深三尺雍正五年勦開

明史河渠志泰昌元年十二月總河侍郎王佐言衛河流塞惟挽漳引沁闢丹三策挽漳難而引沁多患丹水則雖勢與沁同而丹口旣闢自修武而下皆成安流建牖築堰可垂永利

府志小丹河流至南門外又東北流數里始折而東行東岸地形卑下前邑令朱政於東關外建橋河上以通行旅後令劉建吉修之故名劉公橋乾隆甲辰署令朱近曾於橋北建石牖一座又開涵

洞溉東南及正東紙坊秦場侯莊京裏千倉等邨
地畝

采訪小丹河分支在河內九道堰一水東出設石
斗門以分水濟運清化爲頭牖修武迺二牖由來
久矣後漸廢弛康熙二十五年邑侯張公明遠以
丹河水利啟詳河撫兩院奏準小丹河除春秋漕
運外許民間灌溉田畝乾隆四十九年邑侯朱公
近曾畱心水利捐錢二百緡併秦場侯莊京裏邨
千倉邨龐屯五邨捐貲重修石牖至今永賴

一統志新河明宏治中修濬萬曆中又修

乾隆十七年懷慶府修武縣縣丞王承燧稟稱查

修武有小丹河一道新河一道又蔣河一道丹河
自山西潞源至河內縣九道堰分支經武陟至修
武西南之南謝橋入境環縣南門繞東北歷獲嘉
境至新鄉縣入衛濟運新河自修武西南苟泉陝
起由縣西平政橋至城北七里橋會王母泉水出
東北境由輝縣地方至獲嘉之頭道橫河入丹又
於本縣葛寺迤北接連新河另開蔣河一道會馬
坊等泉亦出東北境由輝縣分流至獲嘉之二道
橫河入丹此修武河道源流之情形也迄今年久
未經挑挖現在新河尾間輝獲兩邑界內淤墊幾
平蔣河地處窪下新河之水俱漫歸於蔣河河身

淺狹不能盡洩上游之水懇賜檄飭自修武葛寺
迤北蔣河頭起酌量開濬竝令輝獲兩邑一律挑
挖分流獲嘉之兩道橫河則蔣河頭尾寬深水能
暢流新河上游亦得宣洩不致漫溢爲患等情奉
撫部院陳檄飭查辦獲嘉知縣吳喬齡詳勘得縣
西三橋寺迤西四里有河溝一道係修武縣蔣河
下游在丹河之北計入獲約四里許河溝分爲二
支一支迤南爲二道橫河一支順北爲頭道橫河
蔣河之水必由兩道橫河方可入丹今頭道橫河
約順長四里許其自十字河口起至牖口止現在
淤塞約二里半許計長五百丈寬一丈二尺寬處

不必再開其五百丈淤處須挑深三尺二道橫河
迤南入丹河現俱有水約半里許計長一百二十
丈寬八尺其深處無容加挑寬八尺處此次再挑
寬四尺則蔣河之水可以暢流歸丹更無阻滯卽
下游近河各地亦免泛溢之虞矣於十一月初四
日開工十二月初八日挑濬完竣一律深通並無
淤塞

雍正十二年河北道孔傳煥建設橫河牖座碑記
畧云查衛輝府屬之輝縣王范邨懷慶府屬之修
武縣校尉營等處地居窪下歲時積潦一望汪洋
禾稼之區沒爲魚鰕之宅久矣隨巡行相度知此

地與衛輝府屬之獲嘉頭道二道橫河相連擬於其地開渠二道引水由此匯入丹河則積潦有所歸又擬於橫河二口建牖二座以資啟閉則蓄洩得其宜爰與衛懷兩郡守率同各令定議具詳督憲可其議遂各捐貲庀材於五月三日興工迄六月十三日工竣於時兩地積潦由二渠引入橫河順流而入丹河向之一望汪洋者皆水涸而土見矣得地四千五百畝有零給各地戶分領承業爰述開濬歲月勒石牖左使後之官斯土者有所考焉

案頭道橫河二道橫河皆在獲嘉境內因修武新蔣兩河下流之通塞有關閩邑利害故

錄之

府志載前知府沈榮昌議云修武惟新蔣兩河爲諸泉會聚之所而新河又統納眾水以資宣洩前人復於獲嘉縣境內疏橫河二道上承新河并北山迅發之水歸宿於衛河致有深意而尾間則屬鄰封良有司加意民生當和衷而謀疏導兩地俱可免水潦之患矣

知縣鄒光曾啟事云縣北新河一道東逕輝縣境又東流至獲嘉縣劉家橋歸頭道橫河插口入丹河又蔣河一道接新河汊北逕輝縣境歸二道橫河插口入丹河雖經挑挖深通而下游河尾係在輝獲二縣境內年久淤塞不能暢流以致東北鄉

一帶民田廬舍常遭淹浸上年詳奉各憲委本府會同衛輝府勘明應挑本年麥後迺捐廉募夫過境挑挖現在一律深通兩河之水得以建瓴下注東北二鄉可免水患

府志劉公河一名消河知縣劉建吉開以洩縣南窪下積潦

采訪延陵邨西北正北有沙河一道係乾隆四十九年武陟盧理邨沁河沒口嘉慶二十三年武陟古樊邨又淺水出五里許卽入修武境南霍邨北睢邨縣南諸邨正當其衝損壞田廬無數道光三年秋武陟老龍灣沁河又沒淹沒縣南一帶田禾

每逢秋潦水發河漏流水不息至今猶然

教諭張宗泰重濬新蔣二河記修邑之水由縣西南來繞城南而東北注者曰小丹河亦曰預河由縣西平政橋來繞城北而東注者曰新河皇母泉龍王泉大小樸泉諸水入之雍正年間邑令於縣東北水寨宣洩積水開渠一道曰蔣河馬坊泉龍母泉諸水入之新河至獲嘉頭道橫河入丹蔣河至二道橫河入丹惟是修武東北一帶地處窪下至輝獲二縣則其勢漸高斷梗腐草之所棲泊濁流浮沫之所停蓄而輝獲附河居民遂以河所經由之道墾爲耕作之田矣每至夏秋太行山水暴

漲與夫一切溝澮之水竝會於新蔣二河輝縣人
又築隄其北水勢益不獲所歸俾兩河上游之田
禾日在若滅若沒之中遂人人抱無年之痛矣由
是言之二河末流不通附河居民之獲利有限而
上游諸邨之受害無已時也乾隆二十二年二十
五年官斯土者屢有疏壅洩滯之舉但以地界輝
獲二縣不免有所牽制是以功終不就道光初江
右鄒魯齋明府來莅茲邑紳士孫會一等又以濬
河之議來告明府乃親勘兩河情形劃界繪圖稟
請上憲遂會副衛輝懷慶二府輝獲二縣圖度形
勢折衷羣議區處擘畫者年餘而後克從事焉是

役也經始於五年夏五月之朔畢功於本月二十
五日新河自翠梧橋之北迤東其挑五百餘丈蔣
河自頭道橫河起二道橫河止其挑七百餘丈河
面俱寬二丈深五尺河底寬八尺共用制錢七百
緡有奇皆明府捐辦不以累民今而後修邑東北
一帶庶免淹沒之患乎明府莅修多善政如重修
學宮重建書院皆以數十年頽敗不堪之景象煥
然改觀而新蔣二河之役尤便民之大者予故謹
爲之記云道光五年六月吉旦立石

教諭張宗泰重濬新蔣二河暨修石橋記

修武多水患而東北一帶爲尤甚新蔣二河分受

皇母泉馬坊泉及大小樸泉諸水每值夏秋之交驟雨數來山水暴漲一切溪澗之水竝匯於三河河身既不能容下流復多阻滯爲倒流爲旁溢良苗嘉禾日汨沒於波濤浩渺之中而無告者遂眾矣先是宰斯邑者亦嘗爲導達之舉然未能上下數十里通體疏濬故不數年輒堙塞如故道光十年秋海陽趙鳳崖明府莅任性喜爲民任惠業於十一二兩年中敦諭上游附河居民各隨地畝所值修築崖岸浚排壅滯矣而下游之介在輝獲二邑者尚未遑也嗣於十三年四月乃多雇役夫獨力任其經費而少府陳蓮峯又左右之新河下游

疏鑿五百七十五丈蔣河下游疏鑿六百二十五丈新河由頭道牖口入丹蔣河由二道牖口入丹凡闕三旬而事畢而水道遂以舒暢無滯又由輝縣之薄壁鎮以迄修武之官司橋舊爲大道所經中間有新蔣河石橋各一常時牽車服賈者荷擔販貿者絡繹不絕近因日就傾圮遂爲行旅之病爰再捐資六十千屬監生趙殿興等司其事因其舊規重爲整理柱石之不中程者易之橋版之已墜地者起之甃砌密緻視舊加鞏固焉是役也值明府調任武陟之日乃勤念民瘼不以將去任而膜外視之是可尚也

橋路

東西驛路橋座

東自萬箱鋪起

里東橋

在里長屯東

里西橋

在里長屯西

杏花橋

在鞏邨鋪

邨

劉公橋

在東郭外小丹河上前令朱政建後令劉建吉修

龍渠橋

在東門外舊志知縣卜永昇建通志作知縣朱政建東門跨城河者當即此橋

蟹泉橋

在西門外以上二橋道光十四年知縣馮繼照重修

三里橋

在三里屯西十八年馮繼

照重

曹邨橋

在邨東宏治十八年邑人梁言彪等捐建中三孔東西各一孔高寬

俱一丈五尺雍正八年邑人梁雨民等重修嘉慶二十四年知縣趙銘彝重修今橋祇高八尺

楊樓橋

在邨西道光十六年知縣馮繼照建

平陵橋

在欽平陵東高一丈寬七

尺今改築驛路於橋北橋廢

小丹河橋座

西自靳邨起

靳邨橋

在邨南離城三十里

俎近橋

在邨南離城二十五里

高邨

橋

在邨南離城二十里

常位橋

在東常位邨南離城十五里

孟邨橋

在邨南離城十里

梁莊橋

在太梁莊東離城六里

官驛橋

在邨南離

城一里

預河橋

三孔在南關南通武陟

劉公橋

已見驛路橋座

廣德橋

在縣東北里許知縣宋師祁建今廢

陂邨橋

在邨南離城十里

常莊橋

在邨西離城十五里

官司橋

在邨北離城八里

穀豐橋

在西馬廠離城二十二里

稷美橋

在東馬廠離城二十六里

翠梧橋

李

家橋接獲嘉界離城二十八里知縣馮繼照重修

西大路橋座

自王官莊起

王官橋

在西郭外

平政橋

七孔在縣西六里康熙十七年知縣宋師祁易木為

石至三十年霪雨傾塌邑人吳文錦倡捐重修道光十三年橋又壞知縣趙銘彝重修劉公河至此

與新河合流通志西七里
橋知縣任轍修卽此橋

課晴橋
孔
問雨橋

一孔俱在
平政橋西

勸建平政橋碑

舊志失名

事可以勞民而不可佚民者君子不爲之謀厥始
功可以利一時而不可以及數世者君子不爲之
圖厥終故記功者志弗諼也志弗諼美厥功也三
代之政今不可得而覩矣而其立事以便民者其
法具在考夏令九月除道十月成梁蓋以浚治之
力築作之功與斧斤畚鍤之用雖皆預藉於民然
相高下遠近之宜而董畫之使事不終廢而功底
有成則惟良牧是賴故曰美厥終也修武居丹沁

之陽卑溼湫隘水患頗多而大者有二其一小丹河源出丹林自西而來環城三面屈曲紆迴如帶折而北每遇秋霖則怒濤漲溢嚙城隅沒田禾瀕河之民且與魚鰕爭命其一則邑之西七里橋卽今改建平政橋者是距城約七里爲秦涼燕趙之衝達官長者商旅往來輪蹏相接靈泉一泓在西南五十里許邑志所謂苟泉陂也舊有河道年遠淤塞夏秋之交餘波泛溢建瓴而下沿河百里沃壤盡付波臣加以山水奔迅畢匯於此瀦而不行遂成巨壑胥溺爲災病涉久矣昔嘗架木爲梁屢易屢壞且險阻不便車馬近橋東西十餘里蜿蜒

若溝渠微雨則滑渾難行久雨則集水漫衍既苦
無橋又苦於無路則橋與路未可分緩急先後也
先是華亭張公視事時邑庠宋作梅范可友等有
以橋路二事告者公肯其請王甫舉張謝事歸邑
人憚於興作事機幾廢會廣川宋父母來牧是邑
閩民斯欲爲及所未便者人極陳丹河水害及此
地願湯石橋並平治道塗事公毅然曰是余責也
期月之間以次興築丹河則因勢利導深濬高築
水已由地中行矣至橋路則捐金倡眾仍命董國
賓主其事勸導辦集一以委之且諭之曰茲惟有
作庶永其寧思艱圖易實爾之功國賓跪受命爰

攻山石載度土功以雕以斲乃宜乃理屹爾壯固
轟如長虹如砥如矢高聳寬平蓋鬼然西隅之雄
勝也橋南北廣一丈六寸長一十四丈高一丈二
尺路闊二丈四尺高五尺東西延袤十餘里兩旁
徧樹楊柳望若隋隄使長久無崩頽焉復疏靈泉
河道深廣有加於昔不特水患永除且塗泥變爲
膏腴矣是役也始於康熙十二年三月成於十七
年四月使非我公心切民瘼雖基始於前安望其
克成厥終哉余故表而出之以告夫守土之君子
公諱師祁字中良真定棗強人康熙丁未進士
教諭張宗泰重修平政橋記

修武縣西五里許有平政橋焉穹然特起互若長
虹余每驅車其旁爲顧瞻者久之而橋之上則闕
然不見人馬之行蹤蓋橋東西地勢竝處窪下路
與橋不相及則橋雖設與無橋等耳橋之初建以
木康熙十二年棗強宋公師祁宰修武始易以石
歷六七年之久始克歲事嗣於二十九年夏大水
暴至橋面石板爲波濤擁塌幾盡越明年府別駕
陳公來攝邑篆重爲整頓而規模始復其舊迄今
多歷年所又漸就傾圮矣橋之西偏敞斜崩裂橋
上石闕亦消殘墜落蓋僅有存者道光十有一年
海陽趙鳳崖明府莅任恐其遂就頽廢也首籌項

爲倡又屬賁生蔣效先等轉募以共成斯舉計得制錢二百緡有奇乃鳩工庀材鑿山輦石始事於癸巳歲四月八日畢工於五月十五日其寬廣高下長短一仍其舊而兩旁石闌悉增補完備俾堅厚可久又橋東之路裨補者四十丈橋西之路裨補者一百丈均廣二丈八尺高七尺令路與橋相值而車馬便於登降橋之西舊有小橋二亦竝加料理焉先是夏秋之交大雨時行瀉河之水從南來靈泉之水從西南來而待王鎮西北一帶山水爭奔赴於橋之左右橋北積土爲梗而水且由橋東一路郵莊直入縣之順城關行道者迂回緣繞

取邪徑敗良田農民苦之行旅尤稱弗便今則水有所歸大車轉轉小車軋軋輪蹄往來頗捷遂焉明府初意尚欲東達於王官莊道塗咸增築之以調任武陟未暇及乎其全而人言橋北河身迫隘涇霖一降水勢瀾漫而來橋與路雖治而西北一方田禾仍不免淹沒之患斯皆明府未竟之志後之人因其成規而培補之疏濬之庶斯功之不朽也

北大路橋座

自北門外起俗稱十八連橋

鹿山橋

一孔跨北門城河俗名虎頭橋

帶郭橋

二孔在北關

望春

橋

三孔距縣三里

綠茵橋

二孔距縣四里

麥風橋

一孔距縣四里有奇

通泉橋

一孔距縣五里

振鱗橋

三孔距縣五里有奇

藻德橋

一孔

距縣五里有奇

漲雲橋

三孔距縣五里有奇

鏡浦橋

一孔距縣五里有奇

匯波橋

九孔距縣六里有奇即七里橋

水鄉橋

三孔距縣六里有奇

狎

鷗橋

二孔距縣六里有奇

芙月橋

二孔距縣六里有奇

菱渚橋

一孔

距縣七里

蘆筍橋

二孔距縣八里

萬萼橋

一孔距縣八里有奇

稻香橋

一孔在二郎廟前通東板橋路距縣十一里

通泉匯波水鄉

狎鷗四橋舊皆低狹被山水冲陷道光十六年知

縣馮繼照重修增高

知縣馮繼照吳澤十八橋題名記

修武居太行山南而北郭之外則吳澤焉築道十

里儼若隄防相閒架石爲橋一十有八所以宣洩

水潦也出郭而北綠草成茵青萍若屬長楊夾道
時有鶯鳴菱苕牽絲蘋藻漾采麥壠風過陌卷黃
雲樹杪炊煙漁莊入畫遠眺白鹿則見翠靄烝嵐
洵一邑幽敞之境也唯舊橋卑隘頻歲爲山水激
蹙閒多傾圯迺購美材加之恢闊以暢波流仍惜
其俗稱鄙謬不稱風景之美爰各錫以嘉名昭示
士庶勒之貞石永著無窮道光十有八年歲在戊
戌春三月吉日

東北路橋座

朱營橋

在朱營北

正北路橋座

孔莊橋

舊跨丹河今道改橋存

馬道橋

在馬道鄉

典賢街路

在縣署西知縣馮繼照修長九十二丈

砌石口於捕衙廡前長四丈以通衙前及新街之水匯於射圃復於德配天地坊南作小橋引水由學宮之前注於水塘

訓導王世卿馮公路記

縣西門大街范氏宗祠之東折而北直達新街左

學宮右縣署凡往來於學者出入所必經兩旁地

舊窪下夏秋雨潦停積彌望成渠文武官朔望謁

文廟隸役捧輿控馬沒踝泥淖中恆惴惴居民徒

步往來稱弗便蓋已有年矣道光丙申明府蒞橋

馮公督率紳士集人夫培築之高數尺又增修學
前射圃環植以柳鋤鉏畚揭相望肩趾交錯自道
光十六年三月啟工閱十七年六月告竣昔之沮
洳者今則隆隆起焉僚屬得循牆遵路以將事於
黌序氓庶則行者相與歌於塗以爲我賢侯之措
我於安也父老因忻然名之曰馮公路而丐余記
其事余思平治道路周官所詳賢侯惠政及民固
不止此而此亦其一端也是役也監工者新街直
隸州同李繼文等例因牽連得書

東郭石路 自文昌閣之東起至劉公橋下止知縣

趙銘彝勅修

教諭張宗泰勅修石道記

修武當東西之衝車馬往來後先相望則平治道塗其要務矣山左趙鳳崖明府莅任數年以來修廢舉墜多所興作而於導達溝渠修利隄防尤所注意如驛路則起縣之東界以達於西界其北路則起自北關以達於板橋培補增築兩旁濬其水道中央擴其面勢蕩然寬平其爲德於行人甚普然諸鉅功以次就理而細者或以不急視之弗安也邑東關文昌閣迤東以迄丹河之橋中間地勢窪下每逢雨澤過度輒爲泥塗所積牽車至止者往往馬還於渟雖極鞭策之苦而不能前也爰慨

然捐貲爲倡共得制錢若干緡屬監生李國鎮翟興仁司其事欲其永久不敗則拓其基而甃以石地勢較舊增高二尺許寬則一丈六尺長則十五丈有奇是役也擬始於四月六日畢工於五月八日從此途人安蕩平之樂車馬無阻滯之患是固遠邇所深嘉而樂與之者因次其始末而誌之至捐貲人士例書名碑左以不沒其善云道光十三年歲次癸巳夏五月

驛路 自縣東界起至西界止知縣趙銘彝修

城北大路 自北關起至板橋止共十五里知縣趙

銘彝修

朱營路 北至板橋長七里多年積潦不通車馬道

光十六年知縣馮繼照修築高廣輿徒悉便

平政橋路 西至楊理莊長八里被山水冲刷楊理

莊前後尤積潦沮洳道光十六年知縣馮繼照修

令典志

田賦

鹽法

兵防

郵傳

簿書錢穀有司所視爲奉行故事者也修武西北

多山地土瘠隘而賦役偏累明懷慶紀太守均糧

一疏言之甚悉崇禎五年流寇煽毒靡有子遺讀

邑人改驛奏疏其於兵防驛傳抑何痛切詳明也

國朝休養生息已二百年士民樂業行旅無警於田

賦見民生之休戚焉於鹽法見

國用之盈虛焉於兵防驛傳見有備無患而往來譏

察必嚴焉蓋實政也而實心貫之矣故事云乎哉

田賦

賦役全書司頒確冊存於戶房今擇其簡明者著於篇

原額五等民地八千七百三十九頃二十四畝八分四釐五豪八忽七微 除荒

見種成熟地五千七百七十頃九十九畝四分四釐六豪八絲四忽 內分

上地四百八十八頃八十三畝三分六釐三豪一

絲 國

中地一千一百頃零四十二畝二分九釐二豪四

絲 千

下地三千三百六十九頃三十六畝二分九釐五忽

下地四百一十九頃四畝八分七釐一豪六絲八忽

山坡地三百九十三頃三十二畝七分一釐六絲一忽

原額懷慶衛地三百五十四頃三十四畝七分九釐除荒

見種成熟地三百二十頃三十七畝六分九釐九豪內分

中地四頃五十一畝

下地五十一頃七十八畝九分零九豪

下下地二百六十四頃七畝七分九釐

新收更名

原額成熟地一百四十九頃零三畝並照山坡改折行糧熟地五十二頃九十八畝零八釐九豪三絲六忽一微七纖六沙一塵三埃六渺

額徵

實徵丁地銀二萬六千二百七十九兩七錢六釐

漕項銀一千三百四十九兩八錢八分二釐

河夫銀二百九十二兩二錢五分三釐

解河道

解司銀一萬九千六百二十一兩五錢六分八釐

留支銀六千六百五十八兩一錢三分八釐

驛站銀二千八百五十六兩五錢六分二釐

解臬司

裁扣銀六百六十三兩一錢九分二釐

解臬司

奉工役食銀三千八百零一兩五錢七分六釐

漕糧

漕糧四千二百三十二石三斗四升八合三勺

內分

米二千四百三十九石三斗二升三合七勺

麥五百二十石四斗七升九合五勺

豆一千二百七十二石五斗四升五合一勺運赴

楚旺水次交兌軍船運通

案吳志云雍正十年知縣胡睿榕設立橫簿使糧戶便於對照完納乾隆五年知縣劉建吉就里順莊裁革里季

明懷慶府知府紀誠均糧疏

臣備員守職待罪應朝例得據見聞直言利弊臣不敢妄越特以事關民瘼之大者敬爲陛下陳之思惟國初定職止據一時土地之荒熟起科初未嘗有所薄厚於其間也彼開封汝寧歸德南陽等府先俱遭兵其時地荒故其糧頗少獨懷慶一府向來蒙亂比其地方熟故其糧頗多糧之多少不過以地之多寡爲率苟如此其地如此其糧雖至

今行之亦何有不可者但年久勢異而各府之荒蕪皆盡開墾如西華縣志洪武二十四年在冊地止一千九百九十四頃有奇嘉靖十一年新丈地一萬九千七百七十頃有奇永城縣原地一千五百三十頃有奇至嘉靖十一年新丈出二萬六千六百一十九頃有奇在二縣如此在他縣可知是土地實增倍於其舊則糧宜增而不增而顧以其糧分灑之此輕者益見其輕也至於懷慶北枕行山南環黃河中流丹沁年年衝壓則膏腴變爲曠荒者不下千百餘頃又且有藩封各墳址之開占是以糧有包空之說因而人之逃者相繼先河內

縣原編戶一百二十餘里今併爲八十三里修武
縣原編戶六十里今併爲二十九里凡他縣亦皆
類是人逃而地漸荒則土地已非其舊夫糧宜減
而不減而復以其糧包賠之此重者益重無怪乎
懷慶之民日困徵輸而卒無以自安也臣奉命守
此土入其境見其民心竊恫焉遂據河內等六縣
民楊光張相等連名告乞俯念地糧偏累曲賜多
方均減以延餘民等事因詢其故乃查河南總賦
文冊懷慶一府其地四萬二千八百九頃該糧三
十三萬六百二十二石如歸德府七萬四百餘頃
止徵糧六萬七千六百七十餘石計其地懷慶不

及開封等各府十之一二而其糧多不止於十數

倍况懷慶之地每二百四十步爲畝

此下有闕文

每畝

徵糧二三合多不過一升甚者有數畝之地而無一撮之糧以一役之微而免數畝之稅是懷慶一畝之地足當各府三四十畝之稅懷慶不免有徵賦包賠之苦而在各府乃得以恣飛詭影射之姦於此使不有以通融之則苦樂不均而懷慶偏重之累將何時已乎伏望陛下俯察臣言敕令戶部調查黃冊與河南總會文冊一一對閱各府原地若干原糧若干今增地若干該糧若干復查懷慶是否衝歷有無開占該餘若干公視八府爲一體

計畝均糧可增則增可減則減當統一之日立畫
一之法則在在皆得以蒙均平之澤也若開封等
各府猶堅忍偏護不肯一體通融必不得已姑先
調停如糧數雖同而起運存畱有輕重之互異起
運雖同而本色折色有省費之不倫卽於派糧之
日酌量輕重定爲規則將本府準改存畱糧七分
起運糧三分算每地一畝仍改重糧二升三合四
勺輕糧五升四合六勺較之他府雖猶重數倍比
之往年則畧輕二升所謂寬一分則民受一分之
賜矣若小灘兌軍比之別項起運錢糧又爲尤重
或將此項重糧通行除兌或量免一半另改起運

折色錢糧以充其數夫兌運改爲折色則本色之
費用可輕起運改爲存留則輸納之艱苦可免雖
不能通融均灑於一省之中而救偏補弊亦得以
減重從輕於一省之內子遺之民有更生之望而
守土待罪之官亦得以勉修職業也惟陛下留神
臣愚幸甚生民幸甚

疏內改重糧輕糧二語疑有誤

明縣人王玉鉉止臨德二倉本色揭帖

揭爲乞遵祖制以免偏殺以完額糧事新議河北
三郡正兌漕米俱徵本色抵兌臨德二倉麥折米
將河南各州縣二倉米每石派給正兌價改還兌
軍其閒汝南二郡徵銀給解二倉各項雜費謂有

數便夫於河南則數便於河北則數不便何也新
議言民出粟之易夫河北南濱河北阻山十年九
旱又土鬆無塘水濱河則不宜穀阻山則宜穀不
耐旱故民之粟有以別田易銀而得之者有買房
產子女易銀而得之者則粟之得最不易衛河雖
係運道民居豈盡傍河如修武去河五十里濟源
去河三百里五十里運石費斗三百里運石費石
則粟之運又不易粟至州縣吏胥閱之佐貳閱之
閱之卽需索也需索而得則粗也爲精而難在大
戶需索而不得則精也爲粗而難在納戶則粟之
上又不易粟入於船船夫竊之百法不能禁粟運

於腳脚夫竊之百法不能禁粟入於場而曬場夫竊之百法不能禁幾經竊而百石不及九十則粟之入又不易故每遇凶荒民引領拭目而望曰庶折邑乎以活殘喘誰有思徵粟者新議所謂粟之便大不便也新議又謂水泉可借夫米竊於船夫非水泉乎况屯子馬頭十數里石角參差十船而敗者一水中多年橋柱杈槎十船而敗者二非水泉乎新議所謂水泉之便大不便也新議又謂減道路之苦夫河南通判誠無輪往之勞河北三郡通判既往臨又往德又還灘往一處者勞乎往三處者勞乎八郡輪往者勞乎三郡獨往者勞乎新

議所謂減道路之苦大不便也新議又謂二倉銀
減去五釐尚有贖銀行一二年不妨再減夫河南
徵銀明中之減可以數計抑知河北徵米暗中之
增有不可以數計乎新議既云官解又云令往年
大戶一併解納夫官有解糧之虛名民受解糧之
實禍官何益乎况大戶無官猶可自圖便宜益之
以官官不滋擾乎新議官盤費十二兩快手盤費
一兩二錢夫二倉係行糧必盡給軍而後完動歷
三時官盤費豈能足用不取之大戶則累在官快
取之大戶則累在大戶究之豈有不取者乎新議
謂本色至倉不由斗歇夫業已在客何能無歇業

已名倉不能無斗但擡價之弊本色所無而轉運
竊取需索之弊已百倍於擡價矣故新議拔本塞
源數事大不便也新議謂二倉該省稱傾家之役
誠爲有見之言然試算之如二郡四州二十四縣
分二倉一萬四千九百石大約不過每縣五百石
簽入大戶每戶不過八十石卽有所賠其能幾何
三郡一州十四縣分八萬八千石大約每縣當得
六千石簽入大戶每戶當得八百石此之所賠寧
有算乎彼以一萬四千比之八萬八千傾之傾者
也始以八郡十二州百有四縣而傾今三郡一州
一十四縣傾之傾者也彼攜銀糴粟而傾此三千

二百里之轉輸傾之傾者也正兌九萬六千石內
有二萬二千石折色已足傾家今上二倉并二萬
二千石之折而不得傾更何如正兌五六年內特
遇凶荒一年折色已足傾家今二倉係軍自領并
一年之折而不得傾更何如正改兌一處收已足
傾家今以二倉兼改兌歷三處數衙門起迴數批
而後完傾更何如河北之赴灘如河南之赴臨德
除二百年人情極熟習有不忍欺不敢欺不能欺
之意已足傾家今遷二倉客投觀潦而主案劔傾
更何如夫新議所稱便者可一言而盡不過謂遠
糴不如遲運今謂新議三不便者亦可一言而盡

卽謂近運又不如遠糴也况二倉之苦不在遠糴
在二十處打點與歷三時不了之費耳夫二十處
打點與歷三時不了之費彼亦一費此亦一費何
閒然之有而顧以相移也夫河南三百六十步計
畝河北以二百四十步計畝河南糧石不及河北
十分之二今并彼萬九千之倉糧而亦去減之又
減將無糧可減而後已乎并我二萬二千之折色
而亦微增之又增將無民可增而後已乎均爲國
家之赤子使河南受益河北受累其將忍乎夫二
倉正兌不知起自何年然祖宗朝業已行之永久
不可不謂之祖制當時河北州縣正改數多河南

各州縣二倉數少調停豈不盡善今以河南之小不便貽河北之大不便此何以說也夫祖制而有不善也猶不可廢况祖制而無不善也何爲廢之夫易窮則變而不窮則不變可知夫使不窮而變將愈窮而不通何如不變之爲愈也惟采而擇之勿使河北父子兄弟至今日而斬刈云

明邑庠生石鎔郡丞劉公墾田記

墾田記記懷郡丞劉公墾修武荒田也先是修武歲屢旱人亾地荒上憲移文開墾適公再署縣事遂慨然自在先請金買牛募民自開隨勸修民其開又勸河內武陟縣民協開力出諸民供給之費

出諸官公日出舍於田野閒躬爲督率不兩月開地三千餘頃在余邨者亦有八十餘頃鄉民王愷等屬記於銘銘惟爲政有經而利民爲大利民有經而惠養爲大若公之政所謂惠而得其要者非歟自歲寢以來戶口彫耗四封荒蕪則政無急於墾田矣公矢日夜力設法開墾俾野無曠土而流民樂業則今之阡陌交錯卽前日之斷壠荒墟也今之禾黍盈疇卽前日之蒼煙蔓草也今之室家樂聚雞犬相聞卽前日之斷垣頽塹狐兔交馳也以此思公之惠公之惠何如哉爰勒諸石以傳不朽公諱應聘號嗣溪山西翼城人隆慶丁卯鄉貢

士兩掌縣事皆萬歷辛卯歲四月吉日立石

案碑在正南路習邨離城八里劉應聘萬歷閒官
同知嘗駐修武勸民開墾荒田沐雨櫛風不憚勤
勞修民德之爲作墾田記

雜稅

當稅銀一十五兩

原額老稅銀五十一兩七錢六分八釐九豪二絲
七忽二微

原額牙稅帖銀一十五兩六錢

活稅銀九兩六錢七分八釐

房地新增銀一百二十兩八錢六分八釐五豪

牙帖盈餘銀八十七兩八錢四分五釐九豪七絲
二忽八微

牙帖新增銀八十二兩三錢八分五釐一豪

活稅盈餘銀五十一兩七錢六分五釐六豪

活稅新增銀五十兩九分六釐四豪

通其實徵各項稅銀四百八十五兩八釐五豪

灘租

馬廠夾河灘地在蔣河南新河北

冊開原額灘租地一十一頃三畝一分九釐三豪

七忽 內分

上則租地六頃七十一畝五分六釐八豪七忽每

畝徵報部租銀五分其徵租銀三十三兩五錢七分九釐

中則租地一頃五十三畝一分七釐二豪八絲每畝徵報部租銀四分其徵租銀六兩一錢二分七釐

下則租地二頃七十八畝四分五釐一豪六絲每畝徵報部租銀二分其徵租銀五兩五錢六分九釐

通共應徵報部租銀四十五兩二錢七分五釐

牧馬官地

俗名馬廠

距縣東北二十二里度其地卽古

之吳澤陂後爲明藩牧馬地

國朝雍正年間取其地之成熟者撥幫河北總鎮兵
餉其地由邑令每年招佃耕種官與佃均分秋收
後變價折色解河北鎮營並造清冊呈報

撫
藩查核

冊開舊管牧馬官地三十五頃八十九畝七分八
釐

一應解鎮銀四百一十兩八錢五分四釐五豪九
絲六忽

一應完錢糧正耗銀二十四兩三錢二分六釐

鹽法

本縣額銷鹽引一千四百三十五道於康熙五十

八年十一月十八日奉

旨分認大宛兩縣鹽引六十六道每年二項共該額銷
鹽引一千五百一道

兵防

營員

舊額設城守經制把總一員五里源防汛外委把
總一員今外委缺裁

營兵

原設馬守兵丁六十名嘉慶二十年撥入滑縣營
守兵二名又撥內黃營守兵一名現在馬兵十
七名守兵三十九名字識一名

演武場

在東門外驛路南距城二里許計地一頃二十畝
舊有亭房礮臺今廢

墩臺八座

東十里鞏邨鋪墩 二十里萬箱鋪墩 西十里
曹邨鋪墩 二十里孫邨鋪墩 三十里平陵鋪
墩 四十里李萬鋪墩 以上六墩每墩馬兵二
名守兵三名

西北五十里黃侍郎口墩馬兵一名守兵二名
正北子房溝墩守兵三名

鋪司

額設鋪兵三十名

在城鋪六名 東十里鋪 二十里鋪 四十里鋪 以上
鋪 二十里鋪 三十里鋪 四十里鋪 以上
六鋪每鋪四名

郵傳

武安驛次衝

舊額設驛塘馬五十二匹乾隆二十三年減馬八
匹現設驛馬四十二匹塘馬二匹

舊設驛馬夫二十五名乾隆二十三年減夫四名
現設驛馬夫二十一名

廢西北有廢址舊爲閑馬之所道光十七年知縣

馮繼照因其地坎坳狹隘迺別於東北買民田二畝以閑馬卽舊址構屋三楹額曰右竹軒外周以垣稍植竹樹名曰躍驄園

知縣馮繼照躍驄園記

園何以名躍驄廢而園也凡廢馬多困於奴隸人之手驂駟氣塞又烏乎躍修武故有驛通燕趙秦蜀歲以帑金易塞下名馬道遠費不資至則非病卽瘠馬不疲於役而疲於廢者蓋什七八矣余惟郵務爲王政之大所至必督圉人善視馬自余宰修武旁近傳修武馬肥余喟然曰馬不惟其眾惟其能躍躍不期于甚駛期于可恆廢之馬駿尾蕭

稍而首昂然而目熒然此非躍者機邪雖然余迎而眠之欲其躍而有恆也否懼其剽也因其恆然後冀其駛也否慮其蹶不振也又因其驥以率夫取馬也否恐其材有及有不及也此余所謂養馬也顧無其地不可試以躍適廢西北署後有廢址焉舊爲閑馬所甚隘道光十七年春余購得廢東民田三畝築垣以閑馬迺於廢址闢而治之爲平岡坡陀爲甬路逶迤爲池爲林木爲百卉紅紫映發其北爲軒三楹額之曰右竹卽而瞰焉坡陀者可以試馬下上逶迤者可以試馬馳驟池可試飲林木可試蔭紅紫落英滿地可以試馬驕使善騎

者策而行則人馬相得騰驤而沛艾是故地之有
體勢也風水之渙爲文也嶽木之欣欣向榮也其
象莫不躍如而馬又烏乎不躍于是取前人等裏
躍青驄句名之曰躍驄園是舉也余以裨郵政也
抑桑田之駕其心塞淵垆野之賦厥思無邪宰惟
師古意焉庶于牧馬得牧民之道也園成乃爲之

記

孟津令淄川呂凝德題躍驄園詩

垆野闕心久芳
園拓數弓驅牛

聽麥賦調馬入花叢香躡苔垣露駢
嘶柳岸風使君勤風駕不用避青驄

福山謝茂

才寶垣題躍驄園詩

浮生如過客曷以形役心簿
領固塵勞亦視力所任緬懷

單父宰琴德何愔愔退之在陽山松栝植滿林豈
伊獨遐曠風采厲俗淳民氣旣恬和與物怡然春

馮公起儒者古義夙所循甯城百廢修麥雉四野
馴以茲大雅材優優政宜人垂簾得清暇吐句成
璆琳閒揮鼠鬚筆鐵畫似懸鉞沖襟愜道素塵埃
不受侵遂栽潘令花麻後拓地新穠英縛錦錦修
竹韻夏金軒閒聽雨過臺敞竹月臨紅橋曲徑轉
荷沼綠雲深草木爭獻媚魚鳥亦相親宜晴並宜
晦隨時色相真矧此校馬射觀禮九杉杉論園試
買夏四圍蔭蕭森偶臨淨瓜宴或烹出水鱗爰招
義皇侶清談倍怡神借
問鞅掌吏此中孰知音

懷寧姜少府慶成題躍

驄園詩

竹廬三尺勝瓊樓小圃青青可漫遊好是
草亭高處結關心民隱望田疇穿林小

鳥似依人柳色初勻已報春悵望行雲雷不住待
花無計滯雙輪最感風塵歲月遷憶叨青眼入

年前驄園奇石崢嶸
立又識先生愛米顛
溧陽汪少府曰暘題躍驄

園詞調寄滿庭芳

仙令風流書生逸致門牆桃
李陰成衙齋隙地手枊好園亭

喜得泉流曲曲小橋東紅蕩花深一任他玉驄驕
躍番入四躡輕看離闌十二參差掩映遮徧畦

町種琅玕千箇畱聽秋聲儻或公餘適性向百
花香裏鳴琴恰好是西南缺處一角遠山青

明縣人王玉鉉改驛揭帖

揭爲省驛改道萬全無害事懷慶驛路自河陽驛
至覃懷驛七十里覃懷驛至寧郭驛六十里寧郭
驛至修武五十里修武至獲嘉五十里大約河陽
至獲嘉由今路二百三十里而遙諺所謂弓背也
河陽至溫縣五十里溫縣至武陟六十里而近武
陟至獲嘉六十里而近大約河陽至獲嘉由南路
一百七十里而近諺所謂弓弦也又秋雨淋漓崇
義至懷慶渠水所溢大路難行懷慶至獲嘉山水
所集大路難行河陽至武陟水歸黃沁則路乾可
行也又河陽至獲嘉由今路泥路難行由南路則

沙路可行也由今路遠六十里路泥而常水由南路近六十里路沙而常乾玉與父老議河陽而東於溫縣置驛省覃懷驛所竝官吏而以原驛所銀十分之四貼溫縣由溫縣而東於武陟置驛省宣郭驛所竝官吏歸武陟武陟而東竟至獲嘉省修武驛所竝官吏而以原驛所銀十分之四亦貼溫縣省五驛爲四驛省二百三十里爲一百七十里玉以爲有數便焉或曰溫縣得無不便乎曰溫縣亦便何也驛在五十年前民以爲利爲過客少而工食多也其後過客漸多工食漸少始爲民害今覃懷移四千兩以帖溫縣修武移三千兩以帖溫

縣則過客雖多工食亦不少如修武驛馬一脚應領銀四十五兩今溫縣每腳加以十五兩溫之民且以爲利而何害之有曰兩道公祖不時查盤本府與彰衛不時晉謁南路不稍遠乎又平陽一郡澤州一州之赴京者吳楚三晉之往來者自萬善而東至獲嘉南至武陟不又遠乎曰此有處也修武里長馬二十九腳南馬十一匹合之得四十腳畱南馬與里長馬同供縣役以應上司河內里長馬今四十餘腳添足七十餘腳南馬二十腳合之得九十餘腳畱里長馬六十腳供縣役分里長馬十餘腳並南馬二十腳合之得三十餘腳駐沙邱

鋪以應上司外修武沙邱鋪各畱接遞夫四十名亦可以應司府與過客矣由沙邱鋪行者如全無驛遞之縣止應親臨上司固爲便由南路行者全無親臨上司止應過客亦便之便者也但佐貳官教官舊止用里長馬一匹不分銀兩各房銀兩吏書竝不用里長馬今佐貳官教官旣分銀兩一十四兩外又索里長馬各房吏書亦不時用之里長馬之累幾與驛馬等然此一片牘可革易爲耳夫由今路而行如此之不便由南路而行如此之便而每安焉不改者何也事初或起于匆遽而人情每狃於積習也然玉歷攷古昔則南路之行又非

自今日而始者書曰覃懷底績舊覃懷在武陟縣
張計正南路所由故城猶在謂之覃懷平廣可知
底績於此開道於此可知至晉文之霸東諸侯會
焉曰會於溫盟於踐土皆溫路也晉悼之霸東諸
侯赴焉曰會於溴梁會於邢邱溴梁今沈河邢邱
今平皋亦溫路也漢高帝宿小修武小修武比近
宣陽驛亦武陟往獲嘉之路也况宣陽無驛而以
驛名其爲古驛可知也惟武王伐商由邢邱出北
路如造甲店承恩鎮待王鎮以至修武說苑所載
歷歷可攷乃在今路之北蓋過邢邱而北依山傍
險而行如孔明出師五丈原程子以爲以高臨卑

眞用兵之處也故武德鎮武陟原武陽武五屯之
四在南獨修武一屯在北而師出其間可見古昔
原由南道不知改自何時而據今則從南之便夫
人而知之也昔人曰非常之原黎民懼焉及臻厥
成天下晏如也又曰有非常之人然後有非常之
事有非常之事然後有非常之功三驛之改謂之
非常事不可然以二百五十年之路而改之一旦
謂之常事亦不可故以語常人有捲舌而不敢議
耳愚常見爲民之事在喜事風生者反袖手不出
而愷悌廉平之長每直前而勇往何也爲民之心
切而圖民之便者急也今爲國爲民千載一時鄉

邦之人不知則可知而不言於吾鄉爲不仁於吾君吾父爲不忠玉也不揣草茅一得之愚輒自陳焉惟老公祖超然洞覽豁然大觀深計而獨斷熟察而致行軍國幸甚過客幸甚懷慶一郡官民幸甚

明人修武縣改驛奏疏

失名

題爲叛國巨寇破城劫庫埽境焚戮伏乞聖明乾元再造改驛蠲徵以暢皇仁事臣聞漢史司馬遷有言人勞苦倦極未嘗不呼天疾痛慘怛未嘗不呼親臣當痛苦慘怛之極者也恭誦我聖祖高皇帝臥碑天下利病諸人皆許直言惟生員不許事

切已身許家人抱告聖謨洋洋臣顧謄慄慄豈敢
越數但臣念父死於賊母死於賊兄弟妻子六親
族屬死於賊師友鄉鄰邑民萬命死於賊舉目凄
涼彌天冤痛一念追憶仆地昏絕臣幸得九死一
生之餘息抱不共戴天之仇冤故不敢自愛首領
匍匐萬里伏奏天朝願誅亂賊之殘毒伸萬命之
冤益疏驛路之斷阻成再造之生機惟皇上垂聽
而憐察焉修邑在該省八郡中最屬地瘠民貧行
山北鎮沁水南臨陡坡石蓋硝嫌庠鹵居七中間
可耕者僅一帶之地耳近年遼餉游加驛遞衝繁
差已派徵而復出民間賦旣全完而仍徵來歲殫

其地之出竭其廬之入不足敷三徵百孔之併用也猶幸有父子兄弟聚首偕謀鬻子負債緩死桁楊之下意以食一日毛土輸一日國家九賦之徵延一歲餘生效一歲國家狗馬之力柰皇天降禍去歲九月二十二日陝西反賊稱二十萬眾由北山口飄忽驟至縱橫百二十里蛇蹤豕跡接踵摩肩毒手霜鋒一槩屠戮兩日夜殺死鄉民李林等屍橫徧地何啻巨萬行山前後溝塗枕籍二十四日進修城劫庫獄焚文卷燒房屋掠馬一百餘匹殺縣丞周玖傳典史于守彬訓導朱家彥驛丞張社殺鄉官教諭李時華教授侯來同支解戊子庫

大使焦鏞及邑之士民不可悉計流賊旣劫掠殺於前陽和衛救兵獻功復殺於後其殺在城百姓呂尚德等三千餘級生員楊某妻薛氏等懼辱抱嬰攜穉自盡池井疊屍幾滿有乘夜南逃至沁者武陟禁渡賊至剝衣露體投河爭先含羞葬鯨鯢之腹母子屍相抱不捨閨闈何罪嬰赤何仇天地改色乾坤震盪悲風怒起河水壅流鄉城池井預沁兩河蝗投蟻集之冤靈又不啻二千餘矣逃陟獲輝三縣被殺者不計也其舉火則百炬燭天萬室灰燼其間有老者病者不能逃避或鎖數百於一樓或杜數百於土洞縱火焚熏烈燄中悲號悽

慘不移時疊屍熟斃矣其殘刻則置赤鑿於胃腹以行炮烙蒸油絮於耳鼻以效臍鐙或烹嬰兒或剜兩睛或殺滿門男婦老穉牛馬金帛一掃盡空陽和衛兵平陵迤南札營東離城三十里許逗遛三日任賊殺掠二十六日方纔進兵賊聞復由山後殺回而西陽和衛兵獻功殺掠與賊亦略相當贖餘者皆屏息屍底埋身草萊并逃脫仍迴者寥寥落落僅十分之二三耳蓋逆賊煽禍何代無之荼毒未有如修民殘酷未有如流寇以貧無錢買命又內有猗賊報馬頭山往歲攻擊之恨故也見今賊勢燎原垂涎中土或遠或近風鶴魂驚二月

二十九日賊再入寇河武修三縣境界其勢愈熾慘酷同前循山札營分兵四掠夜焚民舍光映四五十里晝劫鄉邨各處三二百家三月初一日由修境霍邨往東至吳邨輝縣界殺死七百餘人沿山西迴熏死殺死又共約一千餘人而山民始無噍類矣臣痛父母摧心如割憶妻孥憤辱難堪國家三百年休養生息之赤子豈容俱逆賊無饜之凶鋒是以披心瀝膽冒罪瀆奏臣首陳驛路當亟改者古由南路今由北路改北路於南有眾善之兼該者請陳管瀾之見乞聖明采擇焉起孟縣河陽驛東至覃懷驛又東至寧郭驛各七十里東至

武安驛又東至崇宣驛各五十里共二百四十里
在沁河北行山前是爲北路起河陽驛東至溫縣
古名溫泉驛五十里又東至武陟縣又東至元邨
驛各六十里共一百七十里在沁河南是爲南路
議行南路者惟移兩驛減六驛爲四驛減二百四
十里爲一百七十里減二萬一千金之費爲四千
金之費也蓋移兩驛者移覃懷驛於溫縣再置溫
泉驛覃懷驛所之官吏隨之以本驛所銀十分之
二貼溫餘銀解上充餉移宣郭驛於武陟本縣原
有之驛不必貼減兩驛者減修武一驛官吏隨減
以本驛所銀十分之二貼溫餘銀解上充餉減獲

嘉崇寧驛驛所官吏隨減以崇寧驛所銀十分之二貼元邨驛餘銀解上充餉以數計之臣縣馬頭七十腳每年工食銀五千二百八十五兩牛頭七十腳工食銀二千三十兩共七千三百一十五兩合之覃懷兩驛所大約相同修銀當得二萬一千餘金之數各該貼驛所銀一千四百六十二兩三處共貼銀四千三百八十六兩一歲可減萬有餘金且有三便神京川陝七省三關未必無徵取警報之急勢闊呼吸湍逝雲飛北路遠七十里七八月秋雨淋漓波水建瓴驛路汪洋動阻旬月南路則河低路高沙岡乾坦絕無水患減兩驛而仍近

七十里此一便也逆賊劫民先索騾馬次索金銀
則知賊垂涎虎視者惟馬亦探路逕險易以爲攫
取之計修彈丸山城內無守兵外無救援賊如入
無人之境安得不失設復買馬置驛賊來劫掠可
企足而俟南路則南黃北沁陟溫居其中閒陟以
東三十里許黃沁交流地名合河口驛改南路者
賊不得一蹴飛渡亦不得銜枚暗襲誠慮三面阻
河正西一面以精兵掩之將人人授首故連次沁
北焚殺無藝沁南安堵如故者以有此天塹之險
也此二便也過客流離閒關銜命千里倘重繫軍
國一有蹉跌其如急務何今賊在北山後安營由

山口往返出入時來清化鎮及修境殺人劫糧此
寧可令過客行乎惟南路則境中頗靖行李可以
無虞此三便也

舊志此疏不全以其言流寇之禍頗詳故存之

祥異志

水旱癘疫天之所爲也雖然人事亦未嘗無補救
焉令有牧民之責誠念及天災流行何國蔑有則
覩斯民之流亾當必有綢繆於未雨之先者非第
曰望雲物則書讖災祥則書也

漢書五行志地節四年五月山陽雨雹如雞子深
二尺五寸殺三人飛鳥皆死

晉書五行志泰始元年十二月鳳凰二見山陽

錄附元好問戊戌十月山陽夜雨詩二首喪敵之後

繼以荒年一雨百順喜極夢盡情見乎詞攷戊戌

係金世宗大定十八年也詩云

朔吹作還止雲意鬱以周十月雷收

聲陽和自油油此雨非舊雨春旱歷夏秋道路土

三尺今朝見浮漚山城信樂土凶年未消憂一蝗

食禾盡半菽不易求流民四方求斷港魚鰕稠忍

死待一麥秋種且未投乾溢誰所司零壇徧九州

醉飽到狐鬼巫覡自懷羞帝命制江湖野語良悠

悠龍公爲汝賀桑榆定可收霏霏散浮煙霧靄

集微全出門望白塔但覺襟袖潤繁聲忽赴節細
點復成陣久渴疑未厭已作宣小新山陽冬候煖
麥脚易滋分土膏入滲漉破粒容可趁此邦信可
樂風土同一晉單車我東來塵土滿歸鬢裹糧失
先具閉糴困餘吝今朝人事改一雨開百順僧窗
晚色淨喜極夢爲盡枕上一詩成鐙粵落紅爐

元史五行志大德七年六月修武河溢

泰定帝紀泰定三年修武縣旱免其租 五行志
泰定三年蝗

又至正十一年四月地震聲如雷霆圯房屋壓死者甚眾 十三年十二月無雲而雷聲震天地
二十三年七月淫雨害稼

明洪武二年大水

景泰二年嘉禾產於北孔莊一莖兩穗者百餘畝
三穗五穗者半之

金石門有嘉禾記

三年夏濟瀆池有

樓臺影三日迺隱

宏治六年

府志作十年

有星晝隕於北耿邨東嶽廟西

隕時有黑氣聲如雷取視迺一黑石狀似犬首微

熨者久之布政司具奏石貯庫 八年秋霪雨三月不絕沁河泛漲漂人廬舍

正德十一年夏旱二麥不收奏聞免夏稅什七

嘉靖七年春饑人相食秋蝗結塊如斗飛集人屋

院徧滿 十一年飛蝗徧野 三十年大旱典史羅勝

宗與民步禱七日果大雨 三十四年地震山崩屋裂 三十

五年秋大樊口決滄沒靈泉利平等鄉 三十六

年復決前口

萬歷十年風霾天昏咫尺不辨 十二年疫 十

三年秋木欒店蓮萼口決滄縣南一帶 十四年

雨雹傷麥 十五年地震有聲自西北來若雷搖

塌城堞鼓樓碑亭房舍無數冬無雪桃李開粵

十六年春饑民食草木皮盡死者填塞道路或父子相食夏瘟疫大作有一家全死者是歲屬戊子與嘉靖七年戊子合而尤甚 十七年春至四月

不雨無麥 十八年春三月不雨無麥 十九年

秋霪雨風拔木 二十年夏雨雹傷禾 二十三

年秋旱 二十四年夏四月雨雹傷麥秋七月旱

蝗大作所過溝壑盡平禾無遺穗至九月雨 三

十七年無麥秋有年 四十年四月二十七日戊

時雨打麥打死宿鳥不計其數 四十一年沁水

決 四十三年蝗 四十六年麥大熟 四十七

年秋野無青草 四十八年無麥

崇禎五年流寇自西來九月二十四日城破復往
西北去 十年飛蝗自東南來如雲 十一年蝗
十二年元旦夜城隍廟災 十三年大饑人相
食 十四年蝗

國朝順治二年有細蟲如米而青啾蝕二麥秋歉收
三年沁水決 四年沁水決 十一年通志作
十年

沁水決

康熙四年飛蝗自東南來次日即去 七年六月
十六日地震 十八年八月十五日淫雨至九月
二十五日止秋禾損壞 二十三年春旱 是年

十月地震

見通志

二十七年春旱三月不雨冬無

雪 二十八年春旱三月不雨 二十九年春旱

二麥枯 三十年春旱夏無麥秋蝗 三十一年

春旱夏無麥瘟疫大作民多病死 四十二年水

淹禾 四十七年麥薄收秋旱無禾盜賊竊發

五十二年三月十七日勝果寺甃塔頂見青白二

氣者二日 五十三年旱無麥夏無雨六月二十

八日迺雨補種晚禾無收 五十七年八月初十

日雨雹有大如升者自西北山口至東南一帶長

四十里寬十餘里秋禾房屋盡壞 六十年春旱

無麥 六十一年三月十八日地震二麥無收夏

五六月不雨秋禾枯晚禾蟲食

雍正元年春旱瘟疫大作 五年歲大熟 六年

大熟 七年夏二麥倍收里老年八十以上者僉

云有生以來從未見此豐稔也 八年八月十九

日雨雹傷晚禾縣北邨莊樹葉零落若經霜然

乾隆二年九月二十日地震 八年秋禾被旱成

災 十三年正月十二日夜縣署大堂火 十五

年三月二十五日雨雹傷麥秋旱 十六年六月

二十八日大雨山水暴漲沁水決直達小丹河縣

南門外北岸決口城門塞房屋田禾多被淹沒

二十二年六月二十九日山水暴漲縣西白莊諸

邨廬舍秋禾多被淹沖 二十六年七月二十七
日大雨丹沁兩河及境內山水驟漲平地水深丈
餘倒灌入城縣屬二百六十邨房屋廬舍秋禾盡
淹時以爲奇災 二十九年三月二十七日雨雹
東鄉馬廠等十八邨麥禾間被傷損 三十八年
板橋邨產麟

修武縣知縣吳居澳瑞麟圖碑

麟靈物也自軒轅氏以在囿閭歷代皆豔稱之固
不僅見於春秋傳也修武於中州爲小邑幸

國家重熙累洽風雨時和澳得與斯民共優游於化
順之中乾隆乙未年四月八日城東北二十里有

板橋民段姓牛生一物渾身鱗甲粵紋隱見卹民
爭以爲神澳聞而致之與古所傳狼頭獨角虜身
牛尾者近是第足與馬微異耳嗟乎麟足獻祥明
矣而世不常有輒以物之變而不甚愛惜我徐大
中丞博學多聞一見而知其爲瑞命送各官衙亦
莫不爭先快觀焉攷之史冊王者聖仁則出其殆
五行之粹精磅礴鬱積使之然歟澳喜其誕於境
內又恐久而勿傳或傳之而轉失其真也爰倩丹
青圖之以俟後之采風者

三十九年二月初十日風靈

見府志

四十年四月

縣民張興妻一產三男

見府志

四十三年春旱

四十四年秋禾水淹 四十五年二月旱 四十八年大旱風霾屢作天昏黑不辨五色直至五十年六月初三日寅時得雨一陳又自卯至午雨約一犁許始得種秋 五十七年秋旱 五十九年沁水自盧邨決口直衝修邑秋雨連縣山水竝發 閩境被災

嘉慶六年旱魃自縣西北飛入西南光芒閃閃狀類童子是春大風不雨二麥損壞 十年夏秋旱

十八年春三月至夏五旬無雨秋八月二十五日霖雨八日丹水溢陸地成河九月初七日滑匪作亂大兵三次過境十一月初九日逆首李文成

率賊三四千由封邱延津陽武獲嘉新鄉入輝縣
侯兆川修邑大震 二十年九月二十日夜半地
震 二十二年十月連陰二十餘日 二十三年
六月初六日沁水決大樊口平地水深數尺秋禾
盡淹

道光元年夏末秋初疫甚得病輒死棺肆爲空

二年八月初六日至十二日大雨連縣牆倒屋塌
原邨決口三十餘丈沖淹縣南及西南東南一帶
田禾無算 三年水災雹災 十年閏四月二十
二日二十三日地震房屋閒有坍塌 十一年十
二月十一日大雪深三尺 十二年閏九月朔桃

李粵冬十一月大雪嚴寒積二十餘日竹木多凍死十六年秋嘉禾合穎知縣馮繼照據鄉民原報轉詳

補遺

令典志郵傳 呂凝德詩後

署孟縣令武進屠湘題躍驄園詩

躍驄園外騎如隼躍驄園內花

如錦平岡起伏疑山行入門蔥蒨幽香引小池方丈時躍魚修竹數竿新茁筍亭臺高下皆得宜隙地布置不嫌窘主人公暇逸致紆四圍插架多儲書百年文獻精搜討一時翰墨珍璠璣我來幾度下陳榻夜雨疏窗同翦蠟花閒側帽交倡酬石畔揮豪還倒榼忽然耳際鳴蕭蕭不覺令我游興遇百家巖間好山水欲借追風走一遭

祥異志

補漢書五行志條後

蜀志周羣傳注續漢書曰建安七年越雋有男子
化爲女人時羣言哀帝時亦有此將易代之祥也
至二十五年獻帝果封于山陽